



Broj:
Сarajevo, 7.3.2016.

**Parlamentarni vojni povjerenik BiH sastao se sa šefom Ureda za sigurnosnu saradnju
Misije OSCE-a u BiH**

Parlamentarni vojni povjerenik BiH Boško Šiljegović sastao se danas u Sarajevu sa šefom Ureda za sigurnosnu saradnju Misije OSCE-a u BiH Michaelom Delacruzom.

Tokom sastanka Šiljegović je upoznao Delacruza s procesom zaštite ljudskih prava i sloboda pripadnika Oružanih snaga BiH (OSBiH), s posebnim naglaskom na probleme s kojima se ova lica susreću u svom radu. Kao probleme od suštinske važnosti Šiljegović je istaknuo neophodnost rješavanja većeg broja statusnih pitanja, kao i proces unapređenja i činovanja profesionalnih vojnih lica i kadeta. Naročito se osvrnuo na problem nedostatka ogrjeva s kojim se pripadnici OSBiH susreću u zimskom periodu, nedostatak određenih artikala za ishranu, kao i drugih materijalnih i materijalno-tehničkih sredstava. Rješavanje ovih problema ujedno predstavlja i rješavanje jednog od ključnih uslova za rad profesionalnih vojnih lica i kadeta na vojnim lokacijama i kasarnama OSBiH, rekao je Šiljegović.

Naglašavajući važnost postojanja Ureda parlamentarnog vojnog povjerenika u našoj zemlji, šef Ureda za sigurnosnu saradnju Misije OSCE-a u BiH Michael Delacruz izrazio je zadovoljstvo činjenicom da je Misija OSCE-a u BiH od samog početka pratila rad ove institucije. On je naročito istaknuo važnost procesa zaštite ljudskih prava i osnovnih sloboda kroz obaveze koje Bosna i Hercegovina ima u provođenju Kodeksa vojno-političkih aspekata sigurnosti.

Šiljegović je gostu prezentirao najvažnije elemente iz prošlogodišnjeg izvještaja o radu parlamentarnog vojnog povjerenika, koji je nedavno usvojila Zajednička komisija za odbranu i sigurnost BiH i čije se razmatranje u narednom periodu očekuje i na sjednicama oba doma Parlamentarne skupštine BiH. Posebno se zahvalio Delacruzu na pomoći koju je Misija OSCE-a u BiH u dosadašnjem periodu pružala Uredu parlamentarnog vojnog povjerenika BiH, te izrazio vjerovanje da će dobra saradnja između ovih institucija biti nastavljena i u budućnosti.